



# NEWSLETTER BR. 49

MART 2019

## SADRŽAJ

### FIPA AKTIVNOSTI ≡

- » PREDSTAVNIK TEHNOLOŠKOG PARKA HUB 387 U POSJETI FIPA-I
- » FIPA U POSJETI ZEOCHEM D.O.O. ZVORNIK
- » FIPA UČESTVUJE NA 48. IFTDO KONFERENCIJI
- » STRANE INVESTICIJE - PRIORITET DIPLOMATIJE
- » RUMUNSKA PRIVREDNA DELAGACIJA U FIPA-I
- » NOVOIMENOVANI AMBASADORI BiH NA PRIPREMAMA U FIPA-I
- » U JUNU DANI BiH U ISTANBULU
- » PREDSTAVNICI MUSIAD-A NA SASTANKU U FIPA-I
- » FIPA NA MEĐUNARODNOM SAJMU "FOTEG" U ISTANBULU
- » FIPA U POSJETI RUKOVODSTVU OPĆINE SREBRENICA

### FIPA POSLOVNE VIJESTI ≡

- » FIPA SUORGANIZATOR MEĐUNARODNIH B2B SASTANAKA MOSTAR 2019 U SKLOPU MOSTARSKOG SAJMA 2019
- » SREBRENICA: OTVORENA FABRIKA, ZAPOSLENO 40 RADNIKA
- » POZIV ZA DODJELU BESPOVRATNIH SREDSTAVA INVESTITORIMA BH. DIJASPORE: MAKSIMALNI IZNOS GRANTA DO 50.000 KM
- » EBRD INVESTICIJSKA KONFERENCIJA U SARAJEVO DOVODI OKO 3.500 GOSTIJU

# FIPA AKTIVNOSTI ≡



PREDSTAVNIK TEHNOLOŠKOG PARKA HUB 387 U POSJETI FIPA-I



FIPA UČESTVUJE NA 48. IFTDO KONFERENCIJI





## PREDSTAVNIK TEHNOLOŠKOG PARKA HUB 387 U POSJETI FIPA-I



Direktor Agencije za unapređenje stranih investicija BiH (FIPA) Gordan Milinić razgovarao je s izvršnim direktorom Tehnološkog parka HUB 387 Jovanom Musić o mogućnostima zajedničke suradnje na pronalasku potencijalnih investitora u IT sektor BiH.

Tehnološki park je počeo s radom u BiH 2014 s ciljem okupljanja malih lokalnih IT kompanija i freelancer-a. Kompanije koje trenutno posluju unutar HUB-a broje 80 zaposlenih. Tri kompanije koje su na samom početku imale, jednog ili dva zaposlena, danas broje po 100 radnika.

Trenutno je u razvoju nekoliko značajnijih IT projekata poput : „Pametne košnice“ i „Balkan-VIBE“, koji bi mogli biti kandidirani i prezentirani stranim investitorima.

Na sastanku je zaključeno da dosadašnja praksa i rad na promociji investicionih mogućnosti BiH pokazuju da je IT sektor BiH veoma interesantan stranim investitorima, te da se u narednim godinama očekuje ekspanzija stranih investicija u ovom sektoru.



## FIPA U POSJETI ZEOCHEM D.O.O. ZVORNIK



U okviru programa postinvesticione podrške postojećim stranim investitorima u BiH (Aftercare) posjećena je kompanija Zeochem d.o.o. Zvornik sa sjedištem u Zvorniku, 26. marta 2019. Kompanija koju predstavlja direktor Zoran Petković je 100 % u švajcarskom vlasništvu. U Bosni i Hercegovini posluju od 2016. godine i broje 42 radnika, a planiraju nove investicije i zapošljavanja u naredne tri godine.

G. Petković je istakao da je zvaničan početak rada fabrike bio krajem 2017. Radna snaga, geografski položaj i dostupnost sirovina su tri osnovna faktora koja su prevladala prilikom izbora lokacije. S obzirom da je u protekle dvije godine kompanija postigla odlične poslovne rezultate investitor iz Švajcarske, koji inače posluje na više kontinenata i u više zemalja svijeta, je odlučio da se po pitanju eventualnog širenja proizvodnje i investiranja u nove proizvodne objekte, ubuduće primat stavi na proizvodnju u Bosni i Hercegovini. U pitanju je hemijska industrija, a glavni proizvodi su molekularna sita i gelove za hromatografiju.

Kako je u pitanju vrlo rijetka proizvodnja praškastih proizvoda, klijente u inostranstvu je bilo vrlo lako pronaći, a glavne izvozne destinacije pored Švajcarske su Kina, Amerika, Njemačka i druge evropske zemlje.

Investitor je zadovoljan poslovnim okruženjem u našoj zemlji, tako da je širenje proizvodnje i zapošljavanje novih radnika prioritet u narednom periodu.



## FIPA UČESTVUJE NA 48. IFTDO KONFERENCIJI



Direktor Agencije za unapređenje stranih investicija BiH (FIPA) razgovarao je s direktoricom organizacije Origin Group Jasnom Korda o učešću FIPA na 48. IFTDO konferenciji, koja će se održati u Sarajevu, od 24. do 26. juna 2019. godine na temu: „Razvoj ljudskih resursa u eri digitalne transformacije“.

IFTDO (International Federation of Training and Development Organisation) je osnovana 1972. godine u Ženevi u Švicarskoj s ciljem da se razvije i održi globalna mreža posvećena prepoznavanju, razvoju i prijenosu znanja, vještina i tehnologija kako bi se unaprijedili osobni rast, efikasnost ljudskog rada, produktivnost i održivi razvoj.

Ovogodišnja IFTDO konferencija će staviti akcenat na ozbiljnost digitalnog uticaja na poslovanje, koji je doveo do evolucije u ponašanju ljudskih resursa i procesa razvoja te transformirao način na koji radimo zajedno. Konferencija u trajanju od tri dana će okupiti preko 400 učesnika iz više od 50 zemalja svijeta. Prisutni učesnici na konferenciji će biti u prilici razmijeniti svoja iskustva i čuti izlaganja 20 stručnjaka koji dolaze iz 16 zemalja.

O značaju IFTDO-a govori i podatak da imaju svog predstavnika u Ujedinjenim nacijama.

Predviđeno je da FIPA aktivno učestvuje na konferenciji uz organizaciju sastanaka s nekoliko vodećih lidera u svijetu biznisa, koji će biti glavni govornici konferencije.



## STRANE INVESTICIJE - PRIORITET DIPLOMATIJE



U okviru priprema za diplomatsku misiju, novoimenovane bh.diplomate Milica Ristović-Krstić, ambasador BiH u Grčkoj, i Dragan Mihaljević, generalni konzul BiH u Milanu, posjetili su FIPA-u kako bi se dodatno upoznali s nadležnostima Agencije, prilivom stranih investicija, te trenutnim aktivnostima na polju ekonomske suradnje sa spomenutim zemljama. Direktor FIPA-e Gordan Milinić je predstavio nadležnosti i aktivnosti Agencije u sferi stranih ulaganja, radu i podršci stranim investitorima u BiH, te uspješnoj suradnji FIPA-e s nadležnim institucijama od lokalnog do državnog nivoa na polju promocije zemlje i privlačenja investicija.

Govoreći o značaju ekonomske diplomatije na polju afirmiranja BiH imidža kao investicione lokacije, direktor je istakao da je vrlo važno, nakon uspostavljanja kontakata s inostranim poslovnim zajednicama u zemljama prijema, poslati poruku da investitori koji se odluče investirati u BiH, mogu računati na podršku FIPA-e u svim fazama investiranja. Prema zvaničnim podacima Centralne banke BiH, ukupne investicije iz Republike Italije do 31. decembra 2017. godine iznosile su 602.7 miliona KM, a učešće investicija iz Italije je 4.5%, u ukupnom stanju DSI u Bosni i Hercegovini.

Najznačajnije italijanske kompanije u BiH su: Dubicotton d.o.o. Kozarska Dubica, Sportek d.o.o. Kotor Varoš, RS Invest Plus d.o.o. Banja Luka, Olip-Bosna d.o.o. Travnik, itd.

Ukupne direktne strane investicije iz Republike Grčke u BiH procjenjuju se na manje od 5 miliona KM. Jedna od značajnijih grčkih kompanija u BiH je Alpro a.d. Vlasenica, koja posluje u sklopu grupacije Alumil iz Grčke. Tu su i kompanije Termometal d.o.o. Banja Luka, Maria Parket d.o.o. Srbac, Aktor Mostar, i druge.

Dodatno je istaknut značaj organiziranja poslovnih susreta između bh. i stranih privrednika radi jačanja ekonomskih veza, i investicija, na šta će djelovanje novoimenovanih diplomate biti između ostalog fokusirano.



## RUMUNSKA PRIVREDNA DELAGACIJA U FIPA-I



Direktor Agencije za unapređenje stranih investicija Gordan Milinić razgovarao je s privrednom delegacijom Rumunije, na čelu s predsjednikom Privredne i industrijske komore Prahove g. Aurelianom Gogulescuom, o mogućnosti ekonomske suradnje između dvije zemlje, s fokusom na strana ulaganja.

G. Milinić je upoznao rumunsku delegaciju o aktivnostima i nadležnostima Agencije, te generalno o suradnji sa stranim investitorima, podršci koju im pruža u procesu investiranja i nakon što je investicija okončana. Na sastanku je potpisan Memorandum o razumijevanju između dvije institucije s ciljem povezivanja privrednika, uspostavljanja partnerstava, jačanja ekonomske suradnje i povećanja investicija. Dosadašnja ulaganja Rumunije u BiH iznose 3,4 miliona KM, a najznačajnije rumunske kompanije u BiH se bave uslugama, proizvodnjom i trgovinom.

Rumunsku delegaciju su predstavljali privrednici iz oblasti metalne industrije, turizma, proizvodnje rudarske opreme, marketinških usluga i štampanja, itd.

FIPA već nekoliko godina ima uspješnu suradnju s Privrednom komorom Prahove. U 2017. održan je Drugi poslovni forum u Rumuniji u okviru kojeg je predstavnik FIPA-e, u prisustvu rumunskih privrednika, ambasadora Bosne i Hercegovine u Rumuniji, održao prezentaciju o investicionim mogućnostima ulaganja u Bosnu i Hercegovinu, te kao rezultat te posjete organizirana je današnja posjeta rumunske delegacije Bosni i Hercegovini.



## NOVOIMENOVANI AMBASADORI BIH NA PRIPREMAMA U FIPA-I



Direktor Agencije za unapređenje stranih investicija BiH (FIPA) Gordan Milinić primio je novoimenovane ambasadore BiH u Njemačkoj, Mađarskoj i u Stalnoj misiji BiH pri OSCE-u i Uredu UN-a u Beču Jadranku Winbow-Negodić, Biljanu Gutić-Bjelica i Sinišu Bencuna radi priprema za njihov rad na planu privlačenja stranih investicija u BiH. Pored predstavljanja rada Agencije na polju privlačenja investicija i promocije BiH kao interesantne lokacije za strane investitore, g. Milinić istakao je značaj proaktivnog djelovanja ekonomske diplomatije za privlačenje novih investitora i promociju bh. privrednih mogućnosti i jačanju izvoza. Govoreći o radu FIPA-e na animiranju bh. ekonomske diplomatije u posljednje tri godine, potvrdio je da je ova aktivnost dovela do organiziranja većeg broja privrednih manifestacija na kojem su prisustvovali brojni strani investitori, što je rezultiralo otvaranjem kompanija u BiH i zapošljavanjem lokalnog stanovništva. Dodatno je naglašeno da je potrebno uložiti još mnogo zajedničkog truda i rada nadležnih kako bi se efekti ovakvog djelovanja osjetili svuda u zemlji.

Ambasadori su informirani između ostalog i o trenutnoj ekonomskoj suradnji između BiH i spomenutih zemalja, s fokusom na investicije realizirane do sada u našoj zemlji, te najavljenim investicijama. Iskazali su spremnost da djeluju između ostalog u pravcu uspostavljanja kontakata s privrednim komorama i ostalim udruženjima privrednog karaktera, te privrednicima u zemljama prijema kako bi doprinijeli jačanju bh. ekonomije.

FIPA će pružiti sve potrebne informacije s ciljem blagovremenog informiranja strane poslovne zajednice o mogućnostima za ulaganje, uključujući sve privredne sektore koji se promoviraju kao atraktivni za strana ulaganja.





## U JUNU DANI BIH U ISTANBULU



U okviru učešća delegacije FIPA-e na međunarodnom sajmu "FOTEG" u Istanbulu, predstavnici FIPA-e na čelu s direktorom Gordanom Milinićem, te konzul BiH u Istanbulu Rabija Mašić organizirali su sastanak sa Senem Cesmecioglu Erdogan, direktorom međunarodnih odnosa u okviru Privredne komore Istanbula.

Tom prilikom dogovoreno je da se u Privrednoj komori Istanbula održi manifestacija pod nazivom Dani BiH u Istanbulu u okviru koje će biti predstavljeni atraktivni privredni sektori, poslovni ambijent i mogućnosti ulaganja u BiH za više od 200 istanbulskih kompanija. Poseban fokus će biti stavljen na metalo-preradu, turistički sektor i proizvodnju hrane.

Gđa Erdogan je saglasna da pored dobrih prijateljskih odnosa, turski privrednici nemaju priliku saznati detaljnije realno stanje kada je riječ o profitabilnosti poslovanja i mogućnostima za biznis u BiH, i da bi se prilikom organizacije ovog događaja fokus trebao staviti na konkurentne i komparativne prednosti za investiranje, porezni sistem, infrastrukturu, lokacije za ulaganje, toškove poslovanja i sl.

Privredna komora Istanbula jedna je od najvećih privrednih komora na svijetu, s registriranim članstvom od 450.000 kompanija.



## PREDSTAVNICI MUSIAD-A NA SASTANKU U FIPA-I



Povodom najave o održavanju Godišnjeg poslovnog foruma IBF u oktobru 2019 u Sarajevu u organizaciji privrednog udruženja MUSIAD iz Turske, delegacija ovog udruženja, na čelu s osnivačem i predsjednikom Erolom Mehmetom Yararom, posjetila je Agenciju za unapređenje stranih investicija BiH (FIPA) kako bi se detaljnije upoznala s radom i uslugama koje pruža Agencija, mogućnostima poslovanja i ulaganja u BiH, te atraktivnim sektorima za turske investitore. MUSIAD je osnovan 1990. godine, predstavlja 46.000 kompanija koje zapošljavaju 1.600.000 radnika, te broji 11.000 članova. U okviru MUSIAD-a organizira se i IBF-Godišnji poslovni forum koji okuplja 42 privredne organizacije iz 25 zemalja svijeta. U oktobru 2019, forum će biti održan u Sarajevu i okupit će oko 1.000 investitora u tri glavne grupe. To su investitori s područja Turske, zatim arapski investitori iz regije MENA (Bliski istok i sjeverna Afrika), te investitori članovi MUSIAD-a s područja Europe.

G. Yarar je istakao da su turski investitori zainteresirani za ulaganje u zdravstveni sektor, proizvodnju medicinske opreme, poljoprivredu s osvrtnom na uzgoj životinja i preradu mesa, upravljanje turističkim centrima, te energetski sektor. Zatražena je podrška FIPA u smislu predlaganja atraktivnih sektora i projekata za turske investitore, te povezivanju privrednika na forumu. Predstavnici FIPA-e su upoznali turske privrednike s nadležnostima i uslugama koje Agencija pruža stranim investitorima, mogućnostima ulaganja, trenutno raspoloživim projektima za investiranje, te poticajima i olakšicama za strane investitore.

Također će se aktivno uključiti u pružanje svih potrebnih informacija o navedenim sektorima. FIPA pozdravlja svaki vid okupljanja privrednika, jer on doprinosi uspostavljanju novih partnerstava i poboljšanju imidža zemlje, te će u tom smislu dati potpunu podršku i doprinos održavanju ovakve manifestacije.



## FIPA NA MEĐUNARODNOM SAJMU “ FOTEG” U ISTANBULU



Delegacija Agencije za unapređenje stranih investicija BiH (FIPA) učestvuje na međunarodnom sajmu prehrambenih tehnologija “FOTEG” koji se održava u Istanbulu od 7. do 10. marta 2019 godine radi pregovara s potencijalnim stranim investitorima o ulaganju u BiH.

Prvi dan sajma predstavnici FIPA-e su pregovarali o ulaganju s kompanijom “KROMEL”, vlasnika Ismeta Caliskana, a dogovorena je i posjeta BiH radi daljih pregovora.

Uspostavljeni su i kontakti s nekoliko drugih kompanija, koji će biti povezani s vlasnicima projekata u BiH. Tokom prezentacija bh.potencijala, istaknute su prednosti koje BiH nudi stranim ulagačima, počev od značajno nižih operativnih toškova i povoljnih poreza, preko raspoloživih lokacija za iznajmljivanje i izgradnju prerađivačkih postrojenja, neobrađenog zemljišta, mogućnosti izvoza u regiju i EU, itd.

Konstatirano je da se strana poslovna zajednica treba u značajnijom mjeri upoznati s prilikama u BiH, te da je potrebno dodatno raditi na promocija profitabilnosti zemlje za strani kapital i unapređenju imidža zemlje. Sajam između ostalog omogućava uspostavu trgovinskih i investicijskih partnerstava.

FIPA je imala priliku da se sastane s velikim brojem turskih, njemačkih i italijanskih kompanijama iz oblasti prehrambene tehnologije poput: tehnologije prerade i proizvodnje hrane, ambalaže, logistike, sigurnosti hrane, itd.



## FIPA U POSJETI RUKOVODSTVU OPĆINE SREBRENICA



Predstavnici Agencije za unapređenje stranih investicija BiH (FIPA) na čelu s direktorom Gordanom Milinićem posjetili su Općinu Srebrenica kako bi se upoznali s mogućnostima za ulaganje na ovom području, s fokusom na investicione projekte, poslovne zone i objekte, te građevinsko i poljoprivredno zemljište za koje Općina traži strane investitore.

Načelnik Srebrenice Mladen Grujičić je istakao da Općina izdvaja 70. 000KM poticaja za mala i srednja poduzeća i 30.000 KM za zanatske i obrtničke radnje. Područje Srebrenice raspolaže sa značajnim mogućnostima za snažniji razvoj turizma u regiji istočne Bosne, posebno ističući ljekovite izvore Banje Guber za koju se traži strani investitor, lovište Sušica, rijeka Drina, jezero Perućac i drugi lokaliteti koji bi se trebali unaprijediti za značajniji razvoj turizma. Tu su i potencijali za razvoj poljoprivrede s fokusom na proizvodnju organske hrane za što su im također potrebni investitori, te potencijali drvne industrije.

Istaknuto je da uz ljekovite vode Banje Guber i rekonstrukciju postojećih i izgradnju novih turističkih objekata, Srebrenica bi ponovo mogla postati jedno od atraktivnijih turističkih odredišta u ovom dijelu BiH.

FIPA će se dodatno angažirati na pronalasku stranog investitora za Banju Guber, kao i za promociju ostalih projekata Srebrenica putem svoje baze projekata, kao i u direktnim susretima s investitorima zainteresiranim za ulaganje u navedene sektore.

# FIPA POSLOVNE VIJESTI ≡



FIPA SUORGANIZATOR MEĐUNARODNIH B2B SASTANAKA MOSTAR 2019 U SKLOPU MOSTARSKOG SAJMA 2019



SREBRENICA: OTVORENA FABRIKA,  
ZAPOSLENO 40 RADNIKA





## FIPA SUORGANIZATOR MEĐUNARODNIH B2B SASTANAKA MOSTAR 2019 U SKLOPU MOSTARSKOG SAJMA 2019



INTERA Tehnološki park Mostar sa FIPA-om i drugim suorganizatorima i partnerima, te uz podršku Europske poduzetničke mreže, organizira Međunarodne B2B susrete prvog dana Mostarskog sajma 9. aprila 2019. s početkom u 14:00 u dvorani br. 3 Paviljona 1 Mostarskog sajma.

Olakšajte i ubrzajte pronalaženje novih kupaca, dobavljača, partnera, ili naprosto novih poslovnih kontakata iz zemalja iz regije zapadnog Balkana ili šire (Italija, Mađarska, Austrija, Turska, Kina, itd.). Saznajte i kako pristupiti sredstvima iz EU programa „SME instrument“ i „COSME“.

Olakšajte i ubrzajte pronalaženje novih kupaca, dobavljača, partnera ili naprosto novih poslovnih kontakata iz zemalja iz regije zapadnog Balkana ili šire (Italija, Mađarska, Austrija, Turska, Kina, itd.). Učešće na ovim B2B susretima je besplatno, a potvrđena registracija je istovremeno i ulaznica na Mostarski sajam. Saznajte više detalja i registrirajte se na:

<http://mostar2019.talkb2b.net/>



## SREBRENICA: OTVORENA FABRIKA, ZAPOSLENO 40 RADNIKA



Preduzeće MMS Fashion iz Srbije je u Srebrenici otvorilo pogon za proizvodnju ženskog modnog programa. Pogon je otvoren u prostorijama bivše "Vezionice" koje su prethodno adaptirane.

U pogonu će biti zaposleno oko 40 radnika.



## POZIV ZA DODJELU BESPOVRATNIH SREDSTAVA INVESTITORIMA BH. DIJASPORE: MAKSIMALNI IZNOS GRANTA DO 50.000 KM



Otvoren je četvrti javni poziv za dodjelu bespovratnih sredstava u sklopu aktivnosti USAID Projekta "Diaspora Invest". Riječ je o grant programu koji podržava mala i srednja preduzeća. Uvjet je da kompanije nisu starije od tri godine, te da su dijelom ili u potpunosti u vlasništvu investitora iz bosansko-hercegovačke dijasporne, ili da imaju dokazivu trajnu poslovnu vezu ostvarenu preko članova bh. dijasporne.

Poziv je otvoren od 26.02.2019. do 01.04.2019.

PRIJAVU I DETALJE POZIVA MOŽETE PRONAĆI NA:  
[www.grant.diasporainvest.ba](http://www.grant.diasporainvest.ba).





## EBRD INVESTICIJSKA KONFERENCIJA U SARAJEVO DOVODI OKO 3.500 GOSTIJU



Europska banka za obnovu i razvoj (EBRD) svoju godišnju investicionu konferenciju ove godine će održati u Sarajevu od 7. do 9. maja, s fokusom na povezivanje ekonomija za snažniji rast Bosne i Hercegovine. Procjenjuje se da će na konferenciji učestvovati oko 3.500 gostiju, od čega 2.000 visokih zvaničnika, guvernera i diplomata i 1.500 predstavnika privredne zajednice.

BiH će imati priliku da bude domaćin jednog od najvećih događaja u posljednjih 20-ak godina, jer će to biti skup ministara finansija, guvernera centralnih banaka 67 zemalja članica ove velike finansijske institucije, a tu će biti i predstavnici Europske komisije, rukovodstva EBRD-a i drugi.

U okviru samita bit će održano više povezanih događaja koji se odnose na poslovanje EBRD-a, odnosno sastanak guvernera, zatim predstavljanje BiH, kao zaseban događaj. Također, bit će skup velikih svjetskih donatora i sesija posvećena civilnom sektoru.

S obzirom da FIPA učestvuje u organizaciji i koordinaciji aktivnosti na pripremi samita, ovom prilikom će investitorima predstaviti potencijale Bosne i Hercegovine, s fokusom na infrastrukturne i energetske sektore, te IT industriju, turizam, auto i metalnu industriju.



## MISIJA FIPA-E

Agencija za unapređenje stranih investicija Bosne i Hercegovine je agencija koju je osnovalo Vijeće ministara Bosne i Hercegovine, a čija je osnovna zadaća :

- Privlačenje i povećanje priliva stranih investicija u Bosnu i Hercegovinu i poticanje postojećih investitora u zemlji na dalja ulaganja i širenje poslovanja
- Poboljšanje saradnje između privatnog i javnog sektora, predlaganje mjera za unapređenje okruženja za investiranje, a s time i ekonomskog razvoja
- Predstavljanje Bosne i Hercegovine kao zemlje poželjne za strane investitore



## USLUGE FIPA-E

Vijeće ministara Bosne i Hercegovine je zadužilo Agenciju za unapređenje stranih investicija da pruži podršku direktnim stranim investicijama i da olakša priliv stranih ulaganja u našoj zemlji. Agencija saraduje s institucijama vlasti i investitorima, te pomaže nadležnim vlastima da poboljšaju zakonski okvir za strana ulaganja. FIPA takođe pomaže investitorima da uspostave kontakte s javnim i privatnim sektorima BiH. Pokazatelji koji se odnose na priliv investicija, uspostava kontakata i studije privrednih sektora koje su izradili FIPA stručnjaci i nezavisni konsultanti, omogućavaju da investitori budu u potpunosti informirani o investicijskim mogućnostima koje Bosna i Hercegovina trenutno nudi. Osim toga, FIPA usko saraduje i sa ambasadama i diplomatskim predstavništvima Bosne i Hercegovine, koji takođe mogu pomoći investitorima da istraže mogućnosti ulaganja u našoj zemlji.

FIPA pruža informacije, analize i savjete potencijalnim investitorima o poslovnom i investicijskom okruženju, uključujući:

- zakonodavstvo koje se odnosi na direktna strana ulaganja
- podsticaje koji se odnose na ulaganja
- ekonomska i poslovna kretanja u zemlji

FIPA identifikira i predstavlja postojeće bh. mogućnosti za strana ulaganja :

- investicijske projekte u fazi razvoja ili projekte koji su već spremni za realizaciju
- preduzeća u procesu privatizacije
- domaće firme koje traže stranog poslovnog partnera

FIPA pruža pomoć potencijalnim investitorima i onima koji su već investirali u zemlji kroz :

- saradnju s javnim i privatnim sektorom
- saradnju s vladinim i nevladinim institucijama kako bi se olakšao privredni razvoj
- saradnju s lokalnim, regionalnim i međunarodnim organizacijama kako bi se poboljšalo okruženje za ulaganja



## DA BISTE SAZNALI VIŠE O USLUGAMA FIPA-E, KOJE SU BESPLATNE, KONTAKTIRAJTE NAS DIREKTNO.

Dubrovačka 6.  
71000 Sarajevo  
Tel: +387 22 278 080  
Fax: + 387 33 278 081  
e-mail : [fipa@fipa.gov.ba](mailto:fipa@fipa.gov.ba)  
[www.fipa.gov.ba](http://www.fipa.gov.ba)

Ured FIPA-e Mostar  
Kneza Višeslava, Office 54.  
88000 Mostar  
Tel/Fax: +387 36 558 815  
E-mail: [mostar@fipa.gov.ba](mailto:mostar@fipa.gov.ba)

Ured FIPA-e Banja Luka  
Jovana Surutke 13/III  
78000 Banja Luka  
Tel/Fax: + 387 51 226 180  
E-mail: [banjaluka@fipa.gov.ba](mailto:banjaluka@fipa.gov.ba)

A map of Europe with white outlines of countries on a blue background. The country of Bosnia and Herzegovina is highlighted with a yellow and blue flag featuring white stars.

# INVEST IN BOSNIA AND HERZEGOVINA YOUR NEW OPPORTUNITY

[WWW.FIPA.GOV.BA](http://WWW.FIPA.GOV.BA)